



Bersama
Prof Dr Taufiq
Yap Yun Hin

Menyambung tali persaudaraan sesama Muslim menjadi satu kewajiban buat setiap umat Islam.

Apabila tali kasih sayang bertaut, maka hubungan kekeluargaan, persaudaraan serta persahabatan dapat dibina dengan baik.

Menyedari kepentingan serta besarnya manfaat silaturahmi, maka dalam Islam seorang Muslim tidak dapat dikira sempurna imannya apabila dia tidak menghubungkan tali kasih sayang.

Bahkan, Allah mengancam tidak akan masuk syurga kepada

Jaga silaturahmi tanda orang beriman

sesiapa saja yang memutuskan silaturahmi.

Nabi Muhammad bersabda yang bermaksud: "Tidak masuk syurga orang yang memutuskan silaturahmi (hubungan kekeluargaan)." (**Hadis Riwayat Muslim**)

Dalam satu riwayat, Abu Ayyub menceritakan, seorang Arab Badwi bertanya kepada Nabi Muhammad mengenai amalan yang mendekatkan dirinya dengan syurga serta mengenai apa yang menjauhkan dirinya daripada neraka.

Lalu Rasulullah bersabda yang bermaksud: "Engkau beribadat kepada Allah, tidak menyekutukan-Nya dengan sesuatu,

menunaikan zakat dan menghubungkan kekeluargaan."

Begitu pentingnya bagi kita menjaga silaturahmi dalam Islam. Malah, Allah menjanjikan ganjaran besar untuk orang yang sentiasa menjaga hubungan berkeñaan.

Rasulullah bersabda dalam sebuah hadis yang bermaksud: "Sesiapa yang ingin dipermudahkan rezekinya dan ditangguhkan ajalnya (dipanjangkan umurnya) maka hendaklah dia menyambung tali silaturahmi." (**Hadis riwayat Bukhari dan Muslim**)

Walaupun mengetahui kewajiban menyambung

tali silaturahmi antara sesama Muslim, namun pada hakikatnya masih ada ramai umat Islam enggan berbuat demikian.

Mereka tidak mahu menyambung tali persaudaraan, bahkan ada yang sengaja memutuskan tali persaudaraan kerana berlaku hal seperti perbezaan pendapat, 'menganut' fahaman politik kepartian, perebutan harta atau pun lain-lain perkara berkaitan hal keduniaan.

Menjaga silaturahmi adalah tanda-tanda seseorang itu beriman kepada Allah. Sebagaimana dalam hadis yang diriwayatkan daripada Abu Hurairah RA, beliau berkata: Rasulullah

bersabda yang bermaksud: "Barangsiapa yang beriman kepada Allah dan hari akhirat maka hendaklah ia memuliakan tamunya dan barangsiapa yang beriman kepada Allah dan hari akhir maka hendaklah ia menyambung hubungan silaturahmi. Menjalin silaturahmi juga adalah salah satu cara meningkatkan akhlak terpuji.

Firman Allah yang bermaksud: "Dan orang-orang yang menghubungkan apa-apa yang Allah perintahkan supaya dihubungkan dan mereka takut kepada Rabbnya dan takut kepada hisab yang buruk." (Surah Ar-Ra'd, ayat 21)

Bersempena Aidilfitri tahun ini, mari kita mengetepikan segala persengketaan, perselisihan faham dan ideologi politik masing-masing bagi menghubungkan semula tali silaturahmi sesama kita.

Teruskan budaya dan amalan kunjung mengunjung serta mengambil peluang untuk saling bermaaf-maafan supaya kita dapat melupakan segala silap dan salah dengan penuh ikhlas.

Contohi akhlak mulia Rasulullah dalam menjaga peribadi diri serta cara Baginda menonjolkan diri ketika berinteraksi sesama manusia.

**Penulis Presiden
Persatuan Cina Muslim
Malaysia (MACMA) dan
Profesor di Universiti
Putra Malaysia**